

欽定剿平三省邪匪方略

欽定剿平三省邪匪方畧正編卷三百五十二

壬戌年

十二月十六日

癸丑

額勒登保德楞泰勒保惠齡

吳熊光奏言伏惟

聖武維揚大功底定川陝楚著名逆匪全數掃除奏

陳

睿鑒查邪匪之起始自奸民劉松宋之清劉之協等

假燒香治病爲名惑衆歛錢愚民無知被其煽

誘醜類既多遂作不靖其在楚則起於宜都當
陽襄陽而延及鄖宜施南其在川則起於達州
東鄉而蔓及川東川北其在陝則起於興安大
小米溪安嶺汝硯二河等處先後竊發始則蟻
聚以負嵎繼且狼奔而走險楚匪由豫入陝又
由陝入川而川匪與之勾結亂常悖道自外

生成偽設元帥先鋒總兵之名妄立黃藍青白線字

之號焚殺擄掠荼毒生靈抗拒顏行干犯

國法眞神人所共憤爲

天地所不容我

高宗純皇帝十全偉烈震轢古今檄三韓之勁旅集七
萃之雄師逐處處剽分投圍捕

天戈所指每仗殲殺數輒盈千然或元兇已翦而餘黨
尙存或此界方安而彼疆又擾仰惟

聖德好生猶以匪衆悉皆赤子不忍盡予駢誅我

皇上續承

鴻緒密運

神樞

叩食宵衣

抒九地九天之韜畧陳師鞠旅

訓九伐九步之止齊復沛

德音兼施剿撫載懸

懋賞並示

恩威武臣授鉞以專征疆吏持籌以固圉發

帑金而數逾萬萬飛芻輓粟總期士馬飽騰降

璽書而

恩逮元元除稅蠲租益見羣黎鼓舞秦隴蜀棧列卡

雲屯白水漢江連營霧布人有同仇之義集團

練而民盡知方野無齎盜之糧繕寨砦而室皆
安堵軍聲震疊兇黨披靡數年以來次第掃除
所有首逆如覃加耀張正潮王廷詔聶傑人張
正謨劉起榮王三槐羅其清羅其書高均德高
成傑等均獻俘

闕下張什高三馬五冉學勝李彬冉添元冉添泗王
士虎龔文玉龔其位卜三聘龔建王登廷陳傑

伍懷志張子聰徐添壽汪瀛王凌高李槐高見
奇庾向瑤劉朝選楊麟生辛斗辛聰等均生擒
正法林之華齊王氏姚之富張漢潮樊人傑張
添倫徐添德陳崇德冉文儔冷添祿林亮功林
定相蕭占國張長更包正洪李潮符曰明徐萬
福王珊李樹伍金柱阮正澄龐洪勝鮮大川趙
麻花宋國富雷世旺張世濫劉允恭高二楊開

甲張允壽張世虎龍紹周苟文明蒲添寶魏棒
棒陳國珠賴飛隴等均臨陣殲斃計斬擒著名
首逆百餘人積惡頭目數百名並掃除黨與二
十餘萬衆悔罪投首者數萬人三省漸卽肅清
惟戴四趙鑑景英陳侍學張簡湯思蛟熊翠熊
方青唐明萬等蔓草未除困獸猶留尙於邊界
奔竄稽誅仰蒙

皇上重申異命

諭令

臣

等會剿歲功茲又將該匪等先後殄滅統計

川陝楚成股逆匪一律蕩平標營分駐擊柝無
驚耕鑿咸安受塵復業三省之輯寧同慶七年
之兵革全消此皆仰賴

皇上

緒迪

光

聖謨廣運

神機默運於一心

勝算不遺於萬里用能昭茲

聖武集此

膚功上承

純皇帝未竟之

貽謀永綏我

國家無疆之

景祚

臣

等猥以菲才欽承

恩命或統率師干或職任封守際茲掃蕩

功成倍喜發弓

慶洽馳

九重之露布鐃歌千舞通彰

九伐之謨靖萬井之烽烟壤叟衢童齊上

萬年之頌

臣

等實深踴躍歡欣之至謹合詞恭申奏

賀伏乞

皇上睿鑒奏入

上諭內閣曰本日申刻據額勒登保德楞泰勒保惠齡吳熊光等聯銜遞到六百里加緊奏報川陝楚剿捕逆匪大功戡定朕與天下臣民同深欣慰邪

教之始由奸民假燒香治病爲名惑衆歛錢無知
愚民被其煽誘黨與旣多脅從愈衆起於湖北宜
都當陽繼且闖入豫省由陝入川蔓延三省蹂躪
地方無限生靈遭其荼毒不得不盡力剿辦以靖
兇殘溯自嘉慶元年受璽之初卽值辦理軍務朕
仰荷

皇考高宗純皇帝付畀之重兢業實深幸蒙

睿謨指示兩年之間疊次職擒起事首逆多名迨至三
年

皇考聖壽益高秋冬之間

聖體違和每於軍報到時猶復

親授機宜孳孳不倦而朕日侍

左右仰見

皇考精神漸減侍奉湯藥寢食靡寧心志昏迷是以區

畫未能周備以致剿捕事機稍形踈懈猶蒙

皇考隨時訓迪迨彌留前一日仍以

望捷成什追維

在天未竟之志五中悲感益凜忉忉四年正月初三日

愴遭

皇考大故飲泣椎心哀痛弗釋軍書旁午更不能謀慮

周詳直至奉安

山陵禮成始得專心軍務申明軍紀激勵將士責以成
功數年來斬獲著名首逆不下百餘人積惡頭目
亦有數百名悔罪投出者數萬餘人茲幸三省餘
匪一律殄除者定大功永章奏捷從此海寓敕寧
昇平永慶皆仰賴

昊蒼眷佑

祖

考垂慈感慰之餘彌深欽惕此事係剿捕內地亂民雖
非平定外域拓土開疆可比然辦理已及七載領
兵大臣等沐雨櫛風馳驅險阻艱苦備嘗以及檄
兵轉饟團勇安寨之各督撫等並在廷贊預機謀
趨承密勿之王大臣等均能各殫心力用藏鉅功
允宜普沛恩綸酬庸懋賞成親王於四年在軍機
處行走幾及一載贊襄機務一切剿捕機宜深資

壁畫今大功告竣自應嘉獎公勤王已列親藩著
施恩加賞一貝勒令其子綿懃受封儀親王雖未
在軍機處行走但自元年以後軍報絡繹之時王
見朕憂勤每申誠悃時進嘉謨茲當喜報過來同
深歡慶著施恩加封一貝子令伊子綿志受封慶
郡王永璘定親王綿恩前在書房時咸念切軍務
盼捷維殷永璘近來亦醇謹自持深可嘉慰綿恩

在御前大臣上行走夙夜勤慎當此奏績慶成之際亦應一體加恩著再將永璘之子綿懋綿恩之子奕紹俱封爲八分公以昭恩渥額勒登保總統師干公忠懋著謀勇兼優前此平定苗匪時卽經賞給侯爵嗣因剿辦邪匪遲延暫予降黜自膺經畧重任運籌決勝悉中機宜躬親行陣與士卒同勞苦用能屢獲渠魁掃除苞孽業經節次加恩晉

封三等侯爵茲三省全奏底平厥功殊偉額勒登保著晉封一等侯世襲罔替並授爲御前大臣加太子太保銜賞用紫韁以彰殊錫德楞泰前於平定苗匪時亦曾賞給子爵自授爲叅贊後晉率將士奮勇超倫所向克捷前後殲賊最多助績炳然節經封至三等侯爵著加恩晉封一等侯加太子太保銜賞用紫韁伊子蘇冲阿並賞給副都統職

銜卽著賞送賞件前赴軍營看視額勒登保及伊
父德楞泰用示眷念勒保從前辦理冲苗擒渠掃
穴實伊一人之功曾經實封侯爵至今苗民安輯
嗣命赴川省總統軍務奏報生擒賊首王三槐晉
封公爵旋廉知王三槐本欲自行投出其事尙涉
疑似後授爲經畧大臣辦賊遲延降旨逮問復念
其於川省地方情形熟悉仍令赴川帶兵游陞總

督勒保自復任以來倍加奮勉督兵連獲首逆協
同德楞泰將川省全境廓清已加封一等男爵現
當大功戡定核其功過雖不能復還原爵亦當加
以褒封著加恩晉封一等伯並加太子少保銜明
亮爲多年宿將前此在金川帶兵立功甚著迨教
匪滋事後派令統兵剿辦曾將湖北孝感賊匪悉
數殲除辦理最妥嗣因在陝辦理逆匪遲延罷其

世職又因南山賊匪未能迅速殄除降旨述問念
其久歷戎行仍畀以剿捕之寄伊自復用後亦尙
能奮勉立功惟因年老不能衝鋒接仗諭令回京
洊擢都統茲值功竣載念前勞著加恩賞封一等
男西安將軍賽沖阿固原提督楊遇春自隨征以
來在諸將領中勇畧尤著節次殲擒首夥各逆爲
數較多伊二人俱經賞給騎都尉世職著加賞爲

輕車都尉世職惠齡由湖北巡撫任內剿賊旋接
辦總統事務叠獲首逆張正謨等歷陞尙書都統
並給與官銜及輕車都尉世職嗣守制回京因聞
其在軍營亦有延悞之處且賊匪由陝竄川惠齡
不能遏截曾經降黜示懲此次在陝甘總督任內
剿辦南山餘匪辦理遲延復革去花翎降爲二品
頂戴今大功底定念其從前著有微勞惠齡著加

恩賞還頭品頂戴花翎吳熊元自簡任湖廣總督
以來於一切糧運團堡事宜實心經理著加恩賞
給太子少保銜仍交部從優議敘姜晟前在湖北
辦理軍糈並無貽悞嗣因在直隸總督任內報災
延緩罷斥治罪念其尙無大過現以四品頂戴擢
任侍郎著加恩賞給二品頂戴倭什布前在湖廣
總督任內亦曾帶兵剿賊賞給雲騎尉世職嗣因

辦餉稽遲被劾逮問訊明尙非有心貽誤其平日
居官聲名尙好復行錄用以三品頂戴補授巡撫
茲著加恩賞給二品頂戴福寧前在楚境督剿賊
匪曾加賞官銜因在軍營節次獲罪罷職遣戍旋
經釋宥以待衛前往西藏辦事茲著加恩賞給副
都統職銜英善前以侍郎署四川總督亦有勞績
嗣緣事镌秩命在西藏辦事亦著加恩賞給頭等

侍衛溫承惠楊撰文需劉清或帶兵堵剿或籌辦
軍儲勤勞數載均著加恩交部議敘至軍機處行
走之大學士慶桂董誥尙書戴衢亨均經

皇考簡任多年克盡忠悃知無不言言無不盡自用兵
以來承旨書諭勤慎小心朕敬推

皇考之恩慶桂董誥著賞給騎都尉世職戴衢亨著加
太子少保銜仍賞給雲騎尉世職尙書劉權之德

瑛雖在軍機處行走未久其素日陳奏亦時有所見協辦大學士朱珪尙書彭元瑞雖未入直樞廷亦能留心軍務每有敷陳均著加恩交部議敘大理寺少卿章煦在軍機章京上行走年久辦理軍務始終其事著加恩交部從優議敘宜綿前在軍營督剿朔汝河等處賊匪尙未認真後因總統軍務安坐大成寨任賊匪往來奔竄革職發往伊犁

念其年老釋放回京伊究曾出力亦著加恩以六
部員外郎用景安前任河南巡撫不能堵禦賊匪
致令延及川陝其罪甚重業經問擬重辟念其平
日居官廉潔從寬監禁茲軍務告蒞著加恩釋放
伊係本身獲罪非若完顏扎拉芬因伊父魁倫發
遣者可比著發往熱河充當披甲以示朕覃敷惠
閭嘉賞成功至意通諭中外咸使聞知

同日

上諭內閣曰固倫和孝公主素爲

皇考鍾愛下嫁固倫額駙豐伸殷德其品秩原與貝子相等嗣因伊父和珅身獲重譴是以將豐伸殷德一併革職旋經朕格外加恩授爲散秩大臣今當大功戡定恩逮親藩因念固倫和孝公主亦應一體錫予恩施著將豐伸殷德賞給民公品級仍在

散秩大臣上行走俾公主同深歡感以示朕篤念
推恩之至意

上又諭內閣曰額勒登保等六百里加緊馳遞三省
大功告成捷音所有奏事處接遞喜報之員外郎
德興著賞戴花翎仍著與副都統孟佳郎中滿保
清安員外郎長申克蒙額瑞寧一併交部議敘軍
機處章京除大理寺少卿章煦一員業經加恩優

敘外其列入一等滿章京郎中德綸員外郎玉寧
文孚漢章京郎中錢楷內閣侍讀何金主事吳光
悅趙佩湘盧蔭溥姚祖同均著交部從優議敘列
入二等滿章京員外郎瑞麟主事德克津布吉祥
興科昌宜泰松寧祥臨內閣中書多谷安福綿伊
星阿明安泰筆帖式武爾通阿德寧額漢章京員
外郎任烜張志緒汪彥博主事萬雲康奇瑜胡枚

黃躍之曹惠華楊懋恬內閣中書袁煦均著交部
議敘兵部捷報處接遞喜報之員外郎宗室文吉
著賞戴花翎主事扎蘭泰著賞戴藍翎仍著與新
陞內閣侍讀學士之郎中馮世枚員外郎德昌智
凝主事保興筆帖式陳裕翰長慶輔良索寧阿嵩
惠慶齡一併交部議敘其自軍營至京沿途各驛
站接遞喜報之官弁夫役俱著照例獎賞用示恩

資

上又諭內閣曰現在大功告成所有川陝楚各路征防官兵數載以來或身親行陣或嚴防卡隘倍著辛勤朕心甚爲憐憫其從前起身時所借整裝銀兩並在軍營支借俸餉等項除陣傷亡故滿漢官員及兵丁等照例准題豁免外其奏凱回營各官兵借支行裝等項銀兩若照戶部定例官分四季

兵分八季扣繳該官兵等所餘俸餉有限恐不敷
當差之用所有此次奏凱回營官兵借支銀兩著
加恩官員分作四年兵丁分作八年在應得廉俸
餉銀內扣還以示體卹

上又諭內閣曰川陝楚及河南甘肅等省被賊近賊
各州縣應征地丁漕米等項前經隨時降旨分別
蠲緩以紓民力現在大功戡定地方已就肅靖小

民等復業歸農漸臻樂利所有遞年積壓未完各
款自必踴躍輸將但念該地方經積年蹂躪之餘
元氣未復此時甫經安集生計尙艱正當加之培
養俾得永慶盈寧著四川陝西湖北及河南甘肅
各督撫卽查明所屬各州縣廳衛自嘉慶元年至
本年爲止其因被賊近賊不能完納現在帶征被
征民借民欠一切銀米等項分別開單奏聞候朕

施恩豁免該督撫等務當實力詳查毋得稍有遺漏亦不可任官吏等從中隱冒以副朕軫念黎元慶成施恩至意

上又諭內閣曰現在大功告成已明降諭旨普霈恩施因念京外文武大員同殷盼捷亦宜酌量加恩著吏部兵部將文職三品以上武職二品以上從前所得降革留任處分詳悉查明摘敘案由開單

具奏候旨施恩

上又諭內閣曰大理寺少卿章煦在軍機章京上行
走有年兼屆大功告竣遵照前旨回原衙門供職
惟現在編纂紀畧章煦本與其事伊於軍營文報
均曾經手自俱熟悉且大理寺亦無緊要應辦之
事所有剿捕教匪紀畧仍著章煦照前纂辦

臣
等謹按邪匪係內地莠民潢池弄兵本無

足慮而剿除日久存不啻滋蔓之難圖者蓋
其人爲數省之人其地爲數省之地首逆至
百餘名之衆旣非聚而可殲附從有數十萬
之多又難諭之使解或渠魁就剪而遺孽復
又萌芽或黨羽悉除而新教翻增裹脅朝秦
暮楚巢穴本無定居此往彼來竄突亦非一
股加以冰雪潭滑山林阻深饋餉路遙軍行

力乏翦除務盡遂有所難我

皇上本善繼之誠恢舊定之畧

宵衣而起日昃不遑

披覽軍書焦勞

籌筆凡山川之險易賊情之虛實將卒之勤惰剴撫

之得失無一事不關

聖心無一策不符

成算而所以收戰勝之全績集裁定之大勲者臣等

近從編輯竊共討論敬舉

睿謨大端有十夫委任不可不專事權不可不一將
軍副都統之任督撫提鎮之官其分不足相
臨其勢不能相下各任干城之寄非無敵愾
之心然而奏報紛紛謀議淆雜進退之際迭
有猜嫌緩急之間不相救援殊妨體制未協

事宜我

皇上揆幾握要

特頒勅命設立經畧叅贊大臣擇能而任於是責成
既專調度悉合而三省之壁壘爲之一新矣
軍行所向跬步異形賊蹤所趨狙詐百出故
鋒鏑交於原野不能稟命於九重之中機會
變於須臾不能決策於千里之外倘垂措置

必累成功我

皇上坐照如神先機炳燭一切

訓諭所頒言無不盡然惟總籌全局勿令稽延熟計
歲功務臻完善至於分段防守之法相機剿
捕之宜雖皆纖悉上陳間亦仰邀

批答而諄諄之

諭總歸於不爲遙制一言此將帥大臣所以感

信任之專懼辦理之誤竭忠効命悉力盡能也馭軍
貴嚴行師以律賊之衝突堵禦是資賊之奔
逃追剿宜速均有地界可以查核月日可以
參稽而或謊報以邀功或粉飾以卸過不加
究詰旋致混淆我

皇上整飭戎行申明軍紀懲犯者立加逮問玩誤者
莫遁刑誅賊有遁逃必擒其由何卡隘賊有

衝突必問其經何營汛

詔旨飭查人人悚惕故懲一警百之效有旋轉於須臾者追剿之責全任武臣防堵之司兼資疆吏或首逆經時不見而日久忍又跳梁或本境久報肅清而一旦重聞竊發營員之攔剿不力州縣之查緝不周釀毒既堪隱憂夾擊遂無明效我

皇上嚴飭三省督撫諸臣力加振刷其有過境之賊則責武員以就地殲除其有伏匿之匪則責文員以逐處躡緝責無旁貸咎有所歸由是四川陝甘湖北各督撫不分畛域務剷根株遂與帶兵大臣協力同心共成大功矣賊之所至村社爲墟亦有丁男不知團練當其逞鴟張之勢擁蟻聚之徒朝往暮來狼奔豕突

或大兵已遠而聞信不及應援或減邑尙完
而事急不遑遷避故所在遭其擄脅亦每戰
不待齎糧數載以來困於蹂躪我

皇上嘉堅壁清野之議

特敕三省文武大吏勸諭所在民人各修堡寨於是
峙乃芻蕘峙乃楨幹修我矛戟修我甲兵合
繕完之資分守望之責民皆安堵寇弗乘墮

泊乎聲勢相聯官軍遂大收犄角之效矣兵
行糧繼是爲急需三省情形轉輸不易何也
道途梗阻山谷紛岐大營有合有分賊匪時
出時沒或此軍已給更須兼贍別軍或東路
變通又須趨回西路一日不能停待一人不
能缺供我

皇上籌濟帑銀不待諸臣奏請目

特於附近省分存備數百萬兩以供緩急要需別

敕所在倉糧先爲分貯朔寨故餽糧不資裹帶土馬

咸遂飽騰從來辦理供支未有如此之源源

不誤者賊之方張剿爲正辦賊之就解撫合

兼施蓋惑教本屬愚民而陷賊皆思自脫招

致者或虞其反側而乞命者曷忍於駢誅不

宏開網之仁必爲困獸之鬪我

皇上大沛恩綸廣傳示諭曉之以轉禍爲福之理致
之於去逆就順之途於是有殺賊來投詣官
自首或臨陣而呼其同類或隨行而散於半
途一人降而衆人之未降者咸相猜貳衆賊
散而餘賊之未散者自就衰殘遂使烏合之
徒咸成瓦解之勢豈非

好生之德有以集

神武之勲歟老教主謀之輩賊營首事之徒怙惡尤彰逋誅不少罪在不赦情無可原我

皇上特頒賞格明示師中不惜內府金錢顯列戎行爵秩自例賞以至於倍賞由遞陞以至於超陞爰待功能丕彰明信於是將帥竭圍攻之力網遏奔鯨兵勇盡俘馘之能且無脫兔值洪流之迅駛策馬猶前逢陡坎之潛藏躩身

直取或一路連殄數逆或數人共縛一渠乃
至詭託姓名亦遭識認僞充行旅悉被邀遮
更無走險之虞悉正滔天之罰不逾時而積
年稔惡之徒遂無一倖免矣兵威所至戢暴
恒難自昔軍行恒虞濫殺擾干戈之際臨
陣不能區分逃亡谿谷之間盤詰更多疑似
或將士蓄冒功之念誅及無辜或兵勇快仇

殺之心攫其私忿故有全家婦子避賊逢兵
繞路商民出危罹難殊妨生氣兼長亂階我
皇上大德併矜仁恩翔洽於誅戮過當之將領必嚴
辦示懲於疑賊悞殺之弁兵必詳審論罪至
於搜捕零匪之際復

諄諄誠以毋輒擅殺必將獲犯解營審究然後分別
辦理

至誠惻怛流露

訓詞所以消沴戾而釀祥和者又於是乎在鄉勇之
初由於雇募或隨征前敵或幫護城池義共
切於同仇功亦侔乎列校然而三省之衆率
皆無藉之徒桀驁本於性成好鬪成其故態
適當多事之日用其所長迨茲歲續之辰彼
將安往設乖撫馭易啓紛紜我

皇上保大定功安民和衆

諄命帶兵大臣會同三省大吏預爲籌畫各視便宜
或籍之而分散各營或散之而各歸田里鈐
束悉成於勁旅稽查不混於游民而且飾其
衣裝豐其資遣收其器械別其行程形迹免
於猜防

恩澤消其舛望於是數十萬之衆一旦罷歸而行所

無事矣凡此十端大綱斯在簡編所輯本末
可尋此皆我

皇上勝算獨操

淵衷默運

智勇本由

天錫

思慮若與神謀故誠能通天下之志幾能成天下之

務好謀而成我戰則克又况因時激勸之道
先機控制之方威愛並行仁義交輔尙有不
盡於此者哉臣等竊謂三省用兵誠非外域
可比然聖王之馭區宇也內重而外輕國家
之措治平也由近以及遠秦楚隴蜀之交是
爲腹地襄鄧夔巫之界古號上游綿亘道里
數千涉厯州縣數十顧乃豺狼迭起蝥賊橫

行間里騷然人情震動其爲伏莽之害豈不
在內而重可慮哉我

皇上昕夕勞心前後七載

天祐神助戴茲大功用使氛祲廓清奠民生於衽席櫟
槍迅掃還天地於清寧永綏我

大清萬萬年無疆之祚則茲役之告竣也不異於犁
庭掃穴茲書之紀美也何殊乎拓土開疆三

省將帥大臣祇稟

謙衷未敢馳傳露布而騰章奏捷海寓同歡茲編所

垂實與

列聖方畧各編全彰懿鑠矣謹編纂剿平三省邪匪方

畧正編三百五十二卷進

呈敬誌大畧如左具善後事宜別具續編以

進